

四庫全書

史部

欽定四庫全書

史部

聖祖仁皇帝聖訓卷
五

臣 永瑤 恭校

編修 臣 裴 瀚 覆勘

總校 原任中允 臣 王 燕 緒

校對官中書 臣 金 光 悌

謄錄監生 臣 吳 裕 昆

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷二

聖德一

康熙六年丁未七月己酉

上躬親大政詔諭天下曰朕以冲齡嗣登大寶輔政臣索
尼等謹遵

皇考世祖章皇帝遺詔輔理政務殫心効力七年於茲今

屢次奏請朕承

太皇太后之命躬理萬幾惟

天地

祖宗付託至重海內臣庶望治方殷朕以涼德夙夜祇懼
天下至大政務至繁非朕躬所能獨理宣力分猷仍惟
輔政臣諸王貝勒内外文武大小各官是賴務各殫忠
盡職潔已愛民任怨任勞不得辭避天下利弊必以上
聞朝廷德意期於下究庶政舉民安早臻平治凡我軍

民宜仰體朕心務本興行樂業安生以迓休寧之慶政
在養民敢虛

天地生成之德時當親政恒念

祖宗愛育之心布告天下咸使聞知

康熙八年己酉正月戊申

上諭工部前奉

太皇太后諭謂乾清宮交泰殿棟樑朽壞宜撤舊重建以
為朕宮

金史卷之二
慈命諄復朕不敢違但陶唐茅茨不剪夏禹宮室是卑其
毋事華麗止令樸質堅固以稱

太皇太后惓惓至意

八月辛未

上諭吏部前京察處分滿尚書侍郎等因無事故被革俱
給還原官令其候補今思滿漢諸臣被革相同朕原無
異視應一體施恩京察內有漢尚書侍郎被革者察明
議奏

康熙九年庚戌二月癸未

上諭刑部向來定例流徙尚陽堡寧古塔罪人於六月十
二月停遣餘月皆令發往今思自十月至正月俱嚴寒
之候所徙罪人貧者殊多衣絮單薄無以禦寒罪不至
死而凍斃於路甚為可憫繼自今流徙尚陽堡寧古塔
罪人自十月至正月及六月俱勿遣

閏二月庚寅

上諭工部朕經行城外見道旁枯骸惻然可憫或因爾部

修治道途以致暴露亦未可知其令有司掩埋並行各
省凡骸骨悉為收瘞

四月乙未浙江巡撫范承謨疏言仁和縣知縣丁
世淳以繼母劉氏年老呈請終養吏部議覆定例
父母年七十以上者終養竝無終養繼母之例

上曰既有終養之例豈可分別生母繼母丁世淳准其終
養

康熙十年辛亥三月壬子朔

上諭年幼諸王曰聞爾等恃威行事山臬有所利耶夫無益之威逞之何用爾等皆朕懿親人自敬畏至於所屬在外官員原為國家治事理民爾等若勒索其財物彼何所取而應奉耶宜以時嫻習騎射暇則讀書毋徒溺於嬉戲也

是日

上諭和碩安親王曰爾在諸王中以齒則高以行則長若年幼諸王率意妄為爾其訓飭之

四月壬午朔吏部題鑲黃旗拖沙喇哈番阿喇密
故無子弟承襲罷世職其母年老無依應給半俸
嗣後均照此例若係繼母不准給予

上曰繼母亦母也其與生母一體給之著為令

九月辛未

上往盛京謁

陵禮成

諭戶部刑部奉天係

祖宗發祥重地奉天府寧古塔等處除十惡死罪不赦外
凡已結正未結正死罪俱著減等其軍流徒杖等罪俱
著寬釋自山海關至奉天府所屬地方康熙十年十一
年分正項錢糧俱著豁免

康熙十五年丙辰五月丁亥

上諭兵部據寧夏提督趙良棟疏報逆賊犯寧夏河東諸
堡俱被脅從今聞招撫相繼投誠朕思河東各堡因地
狹民稀不能敵賊一時被脅誠非得已其緊從寬宥該

提督仍加意撫綏以副朕惠愛元元至意

七月己酉

上諭兵部吉安一郡逆賊盤踞日久小民被脅蓄髮者多此不過畏死曲從耳且勞師討賊原以為民若大兵所至將蓄髮者槩行誅戮殊非朕撫恤殘黎至意倘有據守城池山寨執持兵械抗拒不降者仍誅勦之其餘俱著免死俾得自新爾部通行曉諭各將軍一體遵行

康熙十七年戊午二月甲辰

上諭兵部廣東兵變時被掠男婦子女可令平南王尚之
信總督金光祖等嚴行察出令人民識認悉皆發還俾
其父子夫妻完聚粵西平定之日將軍莽依圖傅宏烈
等亦各察明被奪人口遣還原籍

閏三月丙寅

上諭戶部朕巡視京畿見八旗亡故軍士葬地窄狹邱墓
累累亦有竟無塋地者皆因郭外近地價值騰貴故不
易得本朝軍士奕世効力行間殞命疆場或身被重傷

金史卷一百一十五
卷二
在家老死皆家業貧窮至無葬地朕每觸目甚為憫惻
作何撥給地土俾八旗貧苦兵丁俱獲葬所令議政王
貝勒大臣詳議以聞

四月戊子

上諭兵部吳三桂背恩倡亂伊所屬人員向沐國恩甚久
其中不無被脅者韓大任等既經投誠仍令議叙加恩
其同來護軍甲兵皆國家素所養之人若輩父母妻
子俱陷賊中可遣發令歸滇中俾得完聚其續至者爾

部逐一問明或有願歸者奏聞併發

乙未

上諭戶部前命爾部清察地畝以給出征死亡兵丁葬地必平原高燥之處方可若地勢卑濕不堪為墳塋雖撥給何所用之又須與道路相近若道路太遠則貧家難以趨赴矣至於官員秩卑小民貧乏者皆資地畝為生若取伊等之地撥給兵丁又致伊等失業可查內務府所管地畝及諸王大臣地畝詳加丈量有溢於正額者

給與兵丁以副朕優恤至意

康熙十八年己未四月丙戌

上諭兵部湖南廣西已經底定滇黔指日蕩平凡在京在外大小文武官員內有家口陷於賊中者有孑身投誠家口仍在彼地者有前以抗賊被害而家口尚有遺留者大兵到日一一清察務加保全俾之得所聽其家屬完聚爾部即通行傳諭各路大將軍將軍督撫提鎮等遵行

七月庚申

上諭戶部工部朕御極以來孜孜求治期於上合

天心下安黎庶夙夜兢惕不敢怠荒乃於本月二十八日
已時地忽大震皆因朕躬不德政治未協大小臣工弗
能恪恭職業以致陰陽不和災異示儆深思愆咎悚息
靡寧茲當力圖修省以迓

天庥念京城內外軍民房屋多有傾倒無力修葺恐致失
業壓傷人口五城御史不能逐戶細察止聽屬員開報

於朕加恩軫恤之處不得均沾實惠著另遣滿漢御史
詳加稽察其窮苦兵丁出征在外房屋毀壞妻子露處
無力修葺朕心更為憫念該部即行令八旗都統副都
統叅領親行詳察毋致遺漏

八月甲子

上諭內閣戶部官員兵丁房屋牆垣因地震塌毀甚多
一時不能修葺四品官員以下現食半俸此一次仍行
全給其護軍撥什庫披甲當差人役錢糧著即支與兩

月令其修理

庚辰

上諭戶部通州三河等處遇地震壓死者甚為可憫戶工二部會同將旗下及民人房屋并寺廟被壓之人速察明數目遣司官四員前往驗視動支帑銀帶往有主收殮者給予銀兩無人承認者著所遣司官同地方官設法埋瘞

十二月丙寅

上召大學士等至懋勤殿

諭曰君臣誼均一體勢分雖懸而情意不隔安危欣戚無不可相告語者堂陛之誼固宜如是也邇者朕體初平殿廷不戒被燬於火爾諸臣因朕偶恙復覩此災愛主心切必謂朕當過於憂慮朕披閱經史頗明大道朕之一身上受

祖宗之付託下繫臣民之瞻仰為任匪輕寧不自愛惟是今秋有地震之變又各處饑饉洊臻寇盜未息此朕早

作夜思中心惶懼寢食靡寧者至於殿廷告災乃

上天致警敢不夙夜祇畏修省厥愆然其所闕止屬朕躬
臨御之所但得海宇清晏置斯民於衽席之上則朕今
所居較諸前代茅茨土階尚或過之矣豈至以露處為
慮哉朕自五齡即知讀書八齡踐阼統蒞萬方

太皇太后嘗問朕何欲朕敬對曰臣無他欲惟願天下又
安生民樂業共享太平之福而已當時左右實共聞之
自昔迄今謹持此心兢兢業業恒如一日可以質諸寤

寐倘有政治失宜皆朕躬之咎從不諉過臣下惓惓之意茲與爾等悉之

康熙十九年庚申八月癸未先是吳三桂反平南王世子尚之信從賊及歸正仍隱與弟之節等糾黨誘殺都統王國棟謀亂事覺下議政大臣等集議論罪

上諭議政王大臣等曰尚之信謀為叛逆卿等集議論罪如律但平南王尚可喜航海歸誠効力行間鎮守粵東

著有勞績及吳逆叛亂堅守臣節不肯從逆為逆子尚
之信所逼憤恨殞命朕每念及深為憫惻其妻舒氏胡
氏從寬免死竝免籍沒尚之孝尚之璋尚之隆等俱從
寬免革職枷責尚之信不忠不孝罪大惡極法應立斬
姑念曾授親王從寬賜死其餘逆黨尚之節李天植等
悉按律正法

康熙二十年辛酉七月甲子

上諭吏部兵部凡官員祖母母竝妻緣事者即議鞭責折

贖於大體不合如果事犯重大不妨削其封誥治罪若鞭責折贖小過或將伊夫或伊子孫品級俸祿議罰爾部會議定例具奏

八月丙申

上諭刑部商民領吳逆資本者甚多隱匿者亦或有之若據告追究恐無賴之徒借此詐害富民有累百姓商民為四民之一富民亦國家所庇藏富於民不在計此銖兩以後有首告者俱不准行

九月壬申

上諭戶部積貯為國家大計歲運漕米充實京倉最為緊要旗丁人等輓運勤勞宜加存恤朕頃巡行近畿至通惠河一帶見南米漕船旗丁人等資用艱難生計窘迫恐其苦累難支以致沿途遲滯貽誤倉儲所關匪細前以軍需浩繁漕運額設錢糧節經裁減今應作何酌復著詳議以聞

十二月癸巳九卿詹事科道等以滇南蕩平請加

上

尊號

上諭曰爾等以大憝既除寰宇底定奏請上朕尊號朕思
曩者平南王尚可喜奏請回籍時朕與閣臣面議圖海
言斷不可遷移朕以三藩俱握兵柄深恐日久滋蔓釀
成不測故決意撤回不圖吳三桂背恩反叛八年之間
外內騷動兵民交困賴

上天眷佑

祖宗福庇逆賊蕩平倘復再延數年百姓不幾疲敝耶憶爾時惟有莫洛米思翰明珠蘇拜塞克德等言應遷移其餘竝未言遷移則吳三桂必致反叛也議事之人至今尚多試問當日曾有言吳三桂必反者否及吳三桂倡叛四方擾亂多有退而非毀謂因遷移所致若彼時朕諉過於人將會議言應撤者盡行誅戮則彼等含冤泉壤矣朕素不肯諉過臣下即部院事有錯誤朕亦自任朕自少時以三藩勢焰日熾不可不撤豈因吳三桂

反叛遂諉過於人耶今亂賊雖已削平而瘡痍尚未全復君臣之間宜益加修省息兵養民布宣德化務以廉潔為本用致太平若遂侈然以為功德崇上尊稱濫邀恩賞實可恥也和碩裕親王福全等再三陳請

上復諭曰頃九卿等以逆首既除四方底定奏請上朕尊號朕自御極以來日夜孜孜以乂安生民為念乃逆賊吳三桂一倡變亂遂致塗炭八年當吳三桂初叛時散布偽劄煽惑人心各省兵民相率背叛此皆德澤素未

孚洽吏治不能剔釐所致幸賴

上天眷佑

祖宗威靈滿洲兵士之力逆渠授首姦黨悉除地方平靖
獨念數年之中水旱頻仍災異疊見師旅疲於征調被
創者未起閭閻敝於轉運困苦者未甦且因軍興不給
裁減官員俸祿及各項錢糧并增加各項銀兩仍未復
舊每一軫念甚歉於懷若大小臣工人人廉潔俾生民
得所風俗淳厚教化振興天下共享太平之福雖不上

尊號令名實多如一切政治不能修舉則徒上尊號朕斷不受此虛名也朕自幼讀書覽古人君行事始終一轍者甚少嘗以為戒惟恐幾務或曠鮮克有終以故宵衣旰食祁寒盛暑不敢少間偶有違和亦勉出聽斷或中夜有機宜奏報未嘗不披衣而起朕非不知燕息自怡蓋所愛不在一身總為天下生靈之計政事務求當理官職務在得人期於家給人足百姓樂業而已今吏鮮潔清之效民無康阜之休君臣之間全無功績可紀

倘復上朕尊號加爾等官秩則惟有負愧耳何尊崇之有至於

太皇太后

皇太后加上徽號詔赦天下理所宜然其上朕尊號之事斷不可行乃朕實意非粉飾之詞也自今以往大小臣工宜各洗心滌慮砥節勵行休養蒼黎培復元氣爾等可向九卿各官悉諭朕意不必再行陳請

康熙二十一年壬戌二月甲午外藩王貝勒貝子

公台吉等請上

尊號

上曰朕自御極以來夙夜孜孜勤求化理期於中外乂安
生民樂業今逆寇雖已蕩平治化尚未孚洽前諸王大
臣等請上尊號已經有旨這外藩王等所請亦不准行
四月丁酉

上諭大學士等曰朕巡幸沿邊地方見設立界限處墳墓
毀損枯骨暴露者甚多朕心憫焉夫掩骼埋胔王政所

重可令盛京將軍徧察而瘞埋之

五月丁巳

上諭戶部兵部工部從前盛京守奉

陵寢及山海關等處城守章京員缺俱令其子弟頂補自
停止此例悉由京師補授頃朕以昭告成功展謁

永陵

福陵

昭陵因周視所歷地方見道里遼遠往返艱難若章京員

缺盡從京師補授則家口遷移重為貧窶者之累且將前任章京房屋田地掣給新補之員以致前官孤孀無倚不能回京如欲即留彼處則田廬既空資生何策困苦日甚深用憫惻嗣後盛京守奉

陵寢及山海關等處城守章京員缺不必自京補授著於伊等子弟內令該將軍選擇賢能者具題引見頂補以免往返遷移之苦倘伊等子弟無人堪用別有補授發往之員可另撥田屋給與其前任章京田屋仍行留給

不必掣出令其孤孀得所

六月辛卯

上諭大學士等曰自古聖主每遇水旱災祲未有不行虔禱者今亢旱已甚朕欲虔誠齋戒親行祈禱爾等查例具奏

八月己卯翰林院奏經筵講章

上曰經筵所以講學修德大典也講章須有勸戒箴規之意乃稱啓沃今講章內有道備君師功兼覆載二語太

過其易之

康熙二十二年癸亥閏六月庚申

上諭刑部人命關係重大凡現審人犯自宜蚤取口供速行完結庶不致無辜久禁囹圄淹滯斃命其中有應行詳審及等候質對者或暫行監候或羈禁各門該管官員亦當嚴加稽察不時照管毋令獄卒及守門人等借端需索恣行凌辱雖各犯有應得之罪若未死於法先死於獄既非憲典亦干

天和朕心尤為不忍向來在外各衙門審理人犯或係監斃或在路物故凡一起內至三人以上者定有處分之例今思内外刑獄事屬一體嗣後在內各衙門及各門監禁人犯一起至斃幾人以上者作何處分著九卿詹事科道詳議以聞

十月丁未九卿詹事科道以海寇底定請加上

尊號

上曰加上尊號典禮甚大臺灣屬海外地方無甚關係因

從未嚮化肆行擾掠濱海居民迄無寧日故爾興師進
勦即臺灣未順亦不足為治道之缺朕觀古來史冊盛
世無屢赦之事此時雖頒赦加恩小民未必均沾實惠
治天下之道但求平易宜民而已何用矜張粉飾且吳
三桂勦滅後頒赦未久今又以昇平行赦殊覺太煩朕
但願以平易之道圖久安長治不願煩擾多事可將朕
意傳諭九卿詹事科道知之大學士等隨奏臺灣雖在
海外乃海賊歷年占踞憑恃其險蒙

皇上指授方畧勦撫兼行海賊遂爾向化神功聖德超越
千古非加上

尊號無以慰臣民仰戴之願

上曰海賊乃疥癬之疾臺灣僅彈丸之地得之無所加不
得無所損若稱尊號頒赦詔即入於矜張粉飾矣不必
行

康熙二十三年甲子六月庚戌

上巡幸口外侍臣奏曰

聖駕往幸牧馬地方請乘便過烏闌哈達等處其地水草肥美但柴薪稀少膳房所用已經預備其餘官軍令各帶柴薪前往

上曰凡事豈可獨為朕一人計要當為衆人計也朕所需用豈致有悞惟恐軍士窮乏不能攜帶柴薪以致窘迫設使衆人勞苦朕有何樂即今天下偶有一省水旱朕必遣官支發倉庫即行賑濟雖邊疆海島之遠朕尚惻然加念豈有隨從軍士令其枵腹跋涉乎在爾等有管

軍之責亦應體恤羣下也

十月丙辰

上幸金山乘沙船渡楊子江風浪恬靜舟行甚速

諭侍臣曰自兵興以來恢復岳州長沙多得舟楫之力今
海宇承平昔時戰艦僅供巡幸渡江之用然安當思危
治不忘亂朕乘此舟未嘗不念艱難用武之時非以遊
觀為樂也

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷二

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷三

聖德二

康熙二十四年乙丑四月辛丑

上諭太醫院朕研究經史之餘披閱諸子百家至黃帝素
問內經諸篇觀其義蘊實有惻隱之心民生疾苦無不
洞矚其後歷代醫家雖多著述各執已見若難經及痘

症諸書未能精思極論文義亦未貫通朕甚惜之當茲
海宇昇平正宜懷保吾民躋春臺而登壽域爾等可取
醫林載籍酌古準今博採羣言折衷定論勒成一書以
垂永久副朕軫恤元元至意

十月庚戌

上諭掌膳等官曰天下之物力有限當為天下惜之今酥
油乳酒供給有餘爾等會同慶豐司酌量收取足用則
已不可過多蒙古甚窮乏取者減少則彼貧人日用可

以恒足矣

十一月乙酉大學士等奉

命撰擬蠲免河南湖北及直隸山東被水州縣錢糧

諭旨進呈中有海宇昇平等語

上曰今四方雖定民生未盡悅安朕宵旰不遑勤求閭閻疾苦思得一利民生之事惟恐行之稍遲致民失所攷孜不已庶幾漸見太平且古帝王已治益求其治已安益求其安朕深自省惕常慮始勤終怠不克底於化成

若遽謂昇平而泰然自足非朕勤求上理之初意也自後諭旨中凡此矜張盈滿之言勿復擬入

康熙二十五年丙寅二月己酉以

文華殿告成經筵前一日例應祭

先聖先師於傳心殿具奏

上諭大學士等曰

先聖先師道法相傳昭垂統緒炳若日星朕遠承心學稽古敏求效法不已漸近自然然後施之政教庶不與

聖賢相悖其躬詣行禮以彰景仰之意

康熙二十六年丁卯正月戊子

上諭黑龍江將軍薩布素等曰自雅克薩城解圍以來聞軍士中有患疾者此皆屬滿洲精兵朕甚憫焉今特遣醫二人齎藥治之至羅刹雖與我對壘但我兵攻雅克薩城從未誅戮其人如城中有患疾之羅刹亦聽其就醫使還彼國傳布德意

丙申喀爾喀兩翼汗及七旗濟農台吉等疏請上

尊號

上諭曰喀爾喀諸汗貝勒等戴朕向來仁恩恪恭敬順請
上尊號具悉惻忱但諸汗貝勒等宜仰體朕一視同仁
無分中外至意謹識朕諭和之旨自茲以後無相侵擾
親睦雍和永享安樂更勝於上朕尊號也況前者內外
諸王貝勒大臣等請上尊號未經允行此所奏請亦不
准行著理藩院行文曉諭

五月庚辰

上因天旱詔諭天下曰朕統御天下念切民生夙夜圖治
罔敢少懈邇來歲每不登民食寡乏今茲仲夏久旱多
風農事堪慮此由敷政不均寬嚴過當或土木工興或
民瘼不達事機之失上千

天和陰陽不調災孰大焉朕用是夙夜靡寧減膳撤樂清
理刑獄求言省過齋居默禱雖雨澤薄降尚未霑足皆
因朕之涼德不能上感

天心之仁愛茲當布德行仁赦過宥罪特從寬大用廣好

生應天以實誕施青災肆赦之恩敷政在寬聿昭嘉與
維新之化布告天下咸使聞知

癸巳

上諭九卿等曰京師為天下根本之地殊屬緊要乃數月
不雨雖秋成尚遠而目前旱乾朕甚憂之今欲親行祈
禱爾等大小臣工亦宜盡誠齋戒夫求雨乃以為民朕
之焦勞豈為一身之計祇念窮簷一歲不登即至失所
不但朕心不忍爾等皆國家大臣亦何忍坐視應各矢

至誠毋循故事

康熙二十七年戊辰二月壬子

上諭宗人府自古帝王展親睦族列爵錫封原欲選賢建能旌別淑慝俾咸知勸勉慶流奕世此國家之常經獎勸之至意也朕篤念親親恩禮罔替年至十五即行受封但誼屬本支必皆飭躬砥行端良醇謹益自刻勵動不踰則始無忝於宗潢今親王以下奉恩將軍以上年至十五不問賢否概予封爵以致視為故典罔知激勸

金史卷之三
卷三
嗣後親王以下奉恩將軍以上子孫應俟其年至何歲
作何辨其賢否定其品級等第始應授封著議政王貝
勒大臣及親王以下奉恩將軍以上會同確議具奏

七月癸巳

上以楚省裁兵夏逢龍叛亂

敕諭巡撫丁思孔曰楚省督標裁兵煽亂無知兵民或被
迫脅或為招誘一時入其夥黨官兵一到若分別加
誅朕心深為不忍應速行開示此等原係食糧營卒各

有室家均屬朝廷赤子乃為一二姦徒煽惑自新無路
情屬可憫今特開一面以廣好生如有悔罪投歸即行
免罪仍准安插務令得所果能將賊首擒獻或殺賊來
歸者仍與論功叙錄毋得心懷疑畏爾奉敕諭即通行
曉諭務令翻然悔悟爭先投首早平鼓譟夥黨奠安民
生副朕寬大矜全至意

康熙二十八年己巳四月己卯先是

上以雨澤愆期問九卿等政事得失令詳議陳明至是九

卿等奏

皇上仁恩浩蕩蠲免錢糧慎重刑獄諸事盡善臣等實無

可言

上諭曰自去秋以來雨雪不能霑足間直隸山西山東以至江南浙江皆旱心甚憂之屢諭九卿或有未當及應行之事令其陳奏曾不得一朕思政事失於下則災患應於上如影響然尚書洪範曰僭恒暘若蒙恒風若去歲將舊任諸臣罷斥甚多擇其有品有守者用之至於

在外督撫司道等官近亦頗有令聞似應風雨以時以此觀之所關必在於上非由他故諸臣肯直言乎至祈雨一事朕非不留意前此屢率諸臣禱於

天壇幸皆遇雨此

天愛蒼生於朕毫無與焉目今諸臣誠心祈禱與朕無異若能切直言事是即所以召甘霖也朕一身之識見精力不敢自恃惟爾諸臣之勤慎是賴明示朕懷與諸臣共悉之

五月庚戌大學士九卿等奏曰近聞山東河南大雨霑足直隸大名諸府皆有雨京城昨晚亦已得雨

皇上於宮中日日虔禱憂勞過甚請稍舒

睿懷頤養

聖躬

上曰朕可與他人比耶先人而憂後人而樂理固宜然近因久旱無雨憂勞過甚以致癯弱人或可欺天亦可欺

耶日前祈雨朕雖未躬往而每次祈禱朕皆竭誠齋戒
荷

天之眷得降雨澤此後雨澤霑足朕庶解焦勞也又

命禮部侍郎張英傳諭諸臣曰朕從來覽觀載籍備悉古
帝王遇災修省之道所以深加儆懼遇有災變即小心
兢業朕之憂慮恒在衆人之先今畿輔地方亢旱日久
念係根本之地故朕心甚憂惕寢食靡寧耳可傳諭諸
臣知之

九月壬子大學士伊桑阿等進纂輯政治典訓四

冊

上曰朕御極三十年來惟兢兢祇畏常存始勤終怠之虞孜孜不已每思滿損謙益之戒今閱此書增愧於懷況比年不登民生未遂正當君臣上下協心同慮撫綏萬邦夙夜黽勉尚且不暇豈容自矜自伐以重已過違道取譽以務虛名欲將此書停止編摩卿等議之

十二月乙酉

上諭禮部今歲直隸地方亢旱小民粒食艱難已經蠲免
錢糧兼發帑金倉粟及准輸助米穀賑濟但三冬雨雪
鮮少朕心仍切焦勞即進膳饌亦為損減無非軫念民
生自竭誠悃明年正月祈穀祝文著該衙門更換將朕
肫懇恤民之意切實撰寫進覽

康熙二十九年庚午二月甲戌

上諭大學士九卿詹事科道曰爾等諸臣稱雨澤霑足固
當懼悅但去年大旱民困未蘇昔漢文帝為三代以下

令主賈誼猶以處厝火積薪之上而謂無危為喻以今較之可無慮乎且今雖得雨不知夏秋若何其當遠慮深思愈加軫恤何得稱慶

康熙三十一年壬申十月庚子

上諭大學士等曰近日光祿寺奏停薦新芽茶凡有類於此者俱宜停止其各省慶賀表箋每次遣官齎送不惟驛遞煩擾而齎送官員亦屬勞苦朕思凡物解京均於地方百姓有累省一件如去一病今將表箋停其每次

遣官齋送或應照朝鮮國一年一次彙送凡事皆由督撫具題或著督撫彙收一次齋送爾等會同該部議奏

康熙三十二年癸酉二月甲申

上諭大學士等曰宗族之始皆一祖所生當力敦親睦共相愛恤扶持以為生也今見諸王以下畧無親睦之誼或者同為宗室以他祖父之名名其子若孫者有之朕意此後入八分公以上諸吉凶事會集之禮仍照舊行其未入八分公以下至於閒散宗室吉凶之事亦宜定

會集儀式止令本翼會集若皆令八旗會集則不勝其煩矣如遇喪事則一旗之中為之服別旗惟去其纓又閒散宗室中有極貧者一有吉凶之事諸王以下閒散宗室以上各以其意量為資助在與者既不以為難而受者亦良有所益其會集時視其身之品級以下者一體會集閒散宗室無品級者則視其父之品級會集凡會集不至者有司察叅如此則皆相識而相親矣又宗室中見在名字有相犯者宗人府悉行察改自茲以往

每歲所送宗室人名亦即詳察其有犯者駁之令改爾等將朕此旨同滿洲尚書侍郎宣示諸王及閒散宗室令其定議以聞

康熙三十三年甲戌二月庚午兵部以佐領佛倫等分擬正陪帶領引

見補授順承郡王屬下散騎郎員缺

上曰王年幼左右宜用老成此散騎郎擬正之人與今日引見補授護衛之人皆童稚耳少年相聚何以導王為

善都統希佛歷時甚久且係所屬大臣可召來切責之
康熙三十四年乙亥四月丙辰

上諭大學士等曰平陽府地震朕心深為儆惕或政事有
應行應革者可傳集九卿問之其平陽府屬見任京官
之人欲歸視家室者不必開缺著給假往視

六月庚子

上諭大學士伊桑阿阿蘭泰曰數日間雨水過多若連綿
不止民田恐致被損朕聽政事無日不念切民生今雨

水如此或人事有所未盡著傳集九卿詹事掌印不掌
印科道將應行應革事宜各抒所見以聞

是日

上諭禮部尚書張英曰數日來雨水過多慮傷田禾四月
內又有平陽府地震之災或者陰盛所致朕思天時與
人事恒相感召未可謂災沴為天時適然之數全不關
於人事也堯舜之時猶有都兪吁咈蓋古之聖人已治
而益求其治已安而益求其安故兢兢業業始終如一

朕朝夕以此儆惕於衷三十餘年以來未嘗一日稍自寬假亦有請問日理事者朕不以為然惟存恒久之心時時乾惕耳朕思地方間有荒歉正可動人警戒之念古人所謂遇災而懼也朕於宮中費用從來力崇儉約期以有餘沛恩百姓若非撙節於平時安能常行蠲賑之事耶

七月壬午

上諭吏部兵部各省督撫提鎮官員間令來京陛見原欲

以地方情形及兵民生計面加諮詢具有深意近見來京各官輒以進川馬等物為辭多所置辦雖經却還但恐其在任購買致貽地方官員兵民之累朕本欲詢兵民生計召令前來若反致累兵民殊失朕之初意且川馬如果需用朕自頒特旨令出產地方辦解何須進獻著通行嚴禁

十二月辛丑

上諭大學士九卿等曰朕撫御宇內無日不念切國計民

生比年直隸各省時遇旱潦又平陽府有地震之災朕
屢發帑金倉粟賑濟蠲免錢糧百姓雖未至於流離恐
未盡安生業各省綠旗官兵防禦勞苦深宜體恤至奏
讞罪人雖罹法網亦可憫惻朕夙夜孜孜軫念於中者
久矣今欲特頒詔旨廣沛恩施思獄瀆諸神皆所以福
佑斯民宜遣官虔行致祭嚴飭地方大小官吏務期潔
已奉公撫綏百姓綠旗官兵糧餉多有虛冒尅扣應行
稽覈各省積年逋欠及帶徵錢糧概與豁免除貪官污

吏行間犯罪與十惡等死罪外一切罪犯咸加赦宥令其自新爾等會議具奏

乙巳

詔諭天下曰朕君臨寰宇子育元元惟以薄海昇平人安物阜為念或身處宮禁之中或巡歷郊圻之內勤求民隱宵旰弗遑故歷歲以來減賦蠲租省刑宥過凡有闕於治理務實見於敷施顧邇者畿輔郡縣災傷疊告而山西平陽府屬復有地震之異雖賴所在倉廩素有積

貯及時周賑幸免仇離而朕心祇惕不敢以水旱災沴
視為氣數適然謂必政事之失宜方致陰陽之有忒反
躬循省深儆予辜夫圖治之道莫先於養民逮下之仁
莫重於寬恤茲特誕沛恩膏肆弘赦宥茂迎庥祉丕愜
輿情安民則惠覃敷益下之恩御衆以寬式廣好生之
德布告天下咸使聞知

丁未戶部題烏喇解送貂鼠缺額應將該管官議
罪

上曰數年來因捕貂者衆故不足額以此議處是無辜獲罪若不得佳者朕但少御一裘何關緊要且貂價甚貴而又非必用之物朕亦不甚需之

康熙三十五年丙子十一月己卯

上諭議政大臣等曰天下當以仁感不可徒以威服今朕原無征噶爾丹之意皆噶爾丹所自取且噶爾丹兇暴朕惟待以寬仁噶爾丹姦狡朕惟示以誠信嘗覽經史云惟仁者無敵今噶爾丹窮迫已極遣格壘沽英前來

乞憐朕意仍欲撫之諸臣奏曰此真天地好生之心實
從古所未有也

上曰古之將帥雖善用兵多戮已降或其身不得善終或
子孫不昌此皆好殺之明戒也又古之人主或窮兵黷
武好大喜功朕意不然惟願宇宙雍熙四海昇平家給
人足各得其生而已噶爾丹使人格壘沽英可仍遣回
十二月甲申

上諭大將軍費揚古曰噶爾丹被我軍擊敗後散者散降

者降故朕復親臨塞外欲相機而行今觀陸續降人及格壘沽英之言噶爾丹窮蹙是實朕不忍悉加屠戮不如撫而活之故於爾未至之前朕即降旨招降也

康熙三十六年丁丑正月甲戌

上諭戶部理藩院屢年以來察哈爾八旗官兵從征効力甚苦伊等向無俸糧自今察哈爾官員著比照京官俸量減給與爾等作速定議具奏即於二月支俸時給之
五月癸卯大學士等以蕩平噶爾丹奏請上

尊號

上曰朕覽史書帝王事業貴始終如一不以尊號為貴上世無論矣即明代亦無受尊號者後人並不非之朕自御極以來不曾念及一己只為天下生民計夙夜焦勞惟恐一時怠慢不克有終況噶爾丹之滅由於

上天之篤祐

祖宗之福佑衆將士之勤勞也朕何有焉

皇太后崇加徽號允宜朕之尊號不必加亦不必再奏

六月庚戌諸王貝勒貝子公文武滿漢官員及遠
近士民赴暢春園請上

尊號

上諭曰朕御極四十年雖自始至終孜孜不倦而吏治尚
未澄清民生尚未豐裕士卒尚未休息風俗尚未淳樸
且旱潦災異亦復相仍方今外寇既靖正宜休息生養
徒加尊號何益於治朕蕩平噶爾丹機宜未嘗有失苟
天下共能知之朕願足矣崇上尊號不必行毋復再奏

十一月丁酉

上諭大學士九卿等曰茲因地震示警朕深切悚惕念致治之道無如愛民生重民命朕總理幾務於一切間閭生計及人命事情罔不殫精研究在外直隸各省親民之官務訪求民間疾苦實心愛養其關係人命案件必詳審實情俾無冤抑在內大小官員咸宜勤慎奉職力改前愆以共副朕實圖修省弭災之至意

康熙三十七年戊寅十二月庚戌

上諭宗人府近日朕傳集諸王及閒散宗室於景山校射者將以勸懲賢否也及試以射善射者頗多朕心甚悅其有品秩之宗室俱為王府護衛官職有遷轉之階惟閒散宗室雖有幹濟之才亦無路上進兆姓中凡有才者尚選擇錄用而朕宗室中之才幹者不獲登用良可惜也爾衙門將宗室中材力壯健長於騎射者詳查奏聞朕將授為闕廷侍衛職官視其効力若材力果優勤於供職即授以叅領副都統職任安於庸劣者方罷斥

之家貧無力者一併查奏朕將籌其生計焉

康熙三十八年己卯十月丙戌大學士等以朝審
情實各犯八十三人請

旨

上諭曰人命至重今當勾決命在須臾尤不可不詳慎爾
等於此情實各案既已閱訖各有所見皆當盡言又

諭曰此等雖皆當死然朕猶於當死之中曲求可生之路
不忍輕斃一人念淮揚百姓頻被水災朕怒焉傷之河

患不除夙夜不能暫釋於懷且百姓既被水災存者必至流離轉徙田多不耕賦安從出來年錢糧當於今年預為蠲免庶災黎於水退時可以各歸故鄉安其生業

康熙三十九年庚辰三月丁未

上諭宗人府總領府事和碩簡親王雅布曰宗室覺羅等之女有願與朕養者朕養而嫁之有女年長父母不能遣嫁者朕亦代為嫁之著查明奏聞

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷三

欽定四庫全書

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四

聖德三

康熙四十一年壬午十二月壬辰諸王貝勒貝子
公滿漢文武大臣官員及直隸各省士民以

皇上五十萬壽請上

尊號

上諭曰朕即位四十餘年無刻不以民生休戚為念遠邇
安寧為本雖慶雲景星嘉禾瑞草天書麟鳳之奇總無
關於黔黎亦無係於朕心侈言祥瑞貽譏史冊何裨治
理朕以實心為民天視天聽視乎民生後人自有公論
若誇耀功德取一時虛名大非朕意不必數陳

康熙四十二年癸未十二月乙酉山東巡撫王國
昌疏言東省水災蒙

皇上截漕發帑差官賑濟萬姓懽呼籲請代題謝

恩

上曰王國昌疏稱小民感戴祝頌等語朕自御極以迄於今但以民生為念未嘗一刻不慮諸懷民無災傷各得其所小民雖不行祝頌朕心自懌聞今山東直隸河南穀價騰貴朕方切軫念此所奏已知之

康熙四十三年甲申八月庚午

上諭大學士及講官等曰臣下如有欺蒙朕斷不姑宥此外若為朕躬服食諸事從未咎責一人昨往釣魚處膳

房所備止有肉肴竟忘攜帶飯食諸皇子及近御侍從俱欲咎之朕止之曰彼無心偶忘攜帶耳此乃小事可寬宥之

十一月壬戌

上諭大學士等曰朕嘗閱書史自古大臣得始終善全者少朕今御極四十餘年大學士衛周祚馮溥杜立德李霽宋德宜王熙等俱得全功名而考終命者皆朕竭力保全所致也朕從不多生一事但穆然清靜處之以和

平故諸臣皆得享其福也

康熙四十五年丙戌二月丁巳

上諭大學士等曰今歲山東河南山西等省雨水均調已
經奏報惟近京一帶去歲三冬少雪今春復無雨澤頃
二十七日地又微震一切政事或有當更改處爾等與
九卿會同酌議具奏爾諸臣行事若有缺失亦當各自
反己力加省改

三月丙寅

上諭大學士等曰朕觀前史漢因災異而重處宰相此大謬也夫宰相者佐君理事之人倘有失悞君臣共之竟諉之宰相可乎或有為君者凡事俱付託宰相此乃其君之過不得獨咎宰相也

十月乙巳

上諭戶部國家錢糧理當節省否則一遇災荒蠲免其軍餉河工等項經費必致不敷前光祿寺一年用銀一百萬兩工部一年用銀二百萬兩因朕力崇節儉今光祿

寺一年止用銀十萬兩工部一年止用銀二三十萬兩
矣

康熙四十六年丁亥十月乙酉蒙古諸王貝勒貝
子公台吉等各率所部進獻馬駝

上命却之諭曰朕今教養爾等人皆富庶物盡蕃滋爾等
竭誠進獻朕心嘉悅即與收納無異嗣後爾等其益勤
生計圖維滋息始副朕愛養至意

康熙四十七年戊子八月辛未

上命侍衛伍什常壽等傳諭諸大臣曰近日聞諸阿哥常撻辱大臣侍衛又每尋釁端加苦毒於諸王貝勒等諸阿哥現今俱未受封爵即受封後除伊屬下人外凡有罪過亦當奏聞候朕處分何得恣意妄行乎朕為天下元后凡事但遵大義而行無罪之人未嘗枉法處治八議內三品以上官員雖犯死罪不遽擬絞而必奏聞者所以敦國體非但恤臣下也伊等不遵國憲橫作威勢至令臣僕無以自存是欲分朕威柄以恣其行事豈知

大權所在何得分毫假人如裕親王恭親王皆朕兄弟也於朕之大臣侍衛中曾敢笞責何人耶臣僕有獲罪者朕並不輕宥然從未有輕聽人言橫加僂辱之事且太祖

太宗曾降訓旨戒勿濫行捶楚荼毒無辜煌煌

實錄紀載甚明嗣後諸阿哥如仍不改前轍許被撻之人面詰其被撻之故稍有冤抑等情即赴朕前叩告朕且欣然聽理斷不罪其人也至於爾等有所聞見亦應據

實上陳若一切隱而不奏即爾等之罪矣

十月甲辰

上親書諭旨示諸皇子大臣等曰昨日諸大臣侍衛等奏請調養朕躬朕念君臣一體有懷宜即盡言故特舉朕素念及不遂朕意之處一一明諭朕每思自古帝王撫世承平歷年久遠未有如朕者朕無日不向皇太子允初言治理天下愛育黎庶維繫人心之事慕宋孝宗之孝養高宗語允初曰將以政事付汝朕當擇處水土佳

處時聞汝之令名以優游養性迨後見其所行不善難
託重器遂絕此望古來為君甚難兢兢業業猶有錯悞
今朕年已老幸際衆心胥戴萬國咸寧之時愈加畏懼
宗廟社稷天下黎元皆繫朕躬朕寧敢不慎重弘業置諸
磐石之安乎迨至彼時衆自知有所倚賴也此意極深
即朕亦不自喻豈可徧喻衆人乎爾諸臣知朕精誠無
私深加體念各勤職業不妄生事則朕易於圖治而天
下庶績亦咸理矣所謂各勤職業者即文臣盡忠不愛

錢武臣為國不惜死之類爾諸臣誠能如是則朕懷自暢朕體自安矣若不敬慎所行而欲朕懷寬慰此非忠愛之實心也特諭

康熙四十九年庚寅四月辛酉九卿等議覆僉都御史屠沂條陳節儉一疏

上諭大學士等曰禁止奢僭而崇尚節儉極當於理朕近查宮中人數

皇太后宮及朕所居正宮不過數百人較之明代宮人則

減省多矣先是光祿寺供應宮中用度每年用銀七十萬兩有餘朕漸次節省不使濫溢一年止需七萬兩矣理藩院向來每年賞賜供應外藩賓客用銀八十萬兩今裁減浮費一年止需八萬兩矣戶工兩部前此每年所用錢糧其數過多今十日一次奏聞用過數目所需錢糧已極少矣朕用錢糧節省如是因臣民僭用妄費從前屢有禁約今若又行禁約徒有法令滋繁而已究無補於事也蓋法令非不詳盡皆由臣下奉行不善而

然步軍統領順天府府尹地方該管官員果實心遵行何至如此乎

十月癸未

上諭大學士九卿等曰江南虧空錢糧兩次命張鵬翮察審朕意地方雖有不肖之官侵蝕錢糧未必多至數十萬兩前朕南巡時曾有諭旨凡沿途所用之物悉出內帑預備未嘗絲毫取諸官民督撫等官不遵朕旨肆意那用以致虧空朕若不言內外諸臣誰敢言者但彼任

事之人離任者已多若將因公那用責之新任官賠補朕心實不忍也至俸工銀兩有限即逐年扣補亦難清理且官無俸祿役無工食必致私派以累民朕為天下生民計蠲免各省錢糧已逾萬萬免此四五十萬之銀何足惜乎朕總理機務垂五十年事無大小凡臣下情隱無不灼知洞鑒朕屢次南巡地方官員預備繕夫修理橋梁開濬河道想皆借用帑銀原冀陸續補足而朕三次南巡為期相隔不遠且值蠲免災荒所徵錢糧為

數又少填補不及遂至虧空如此之多爾等皆知之而不敢言也即如緯夫一項雖取用於田畝而所用既多伺候日久勢必給與口糧工價安得無費至於修造行宮亦必借用帑銀前者朕巡視溜淮套工程至彼處見有舍宇三間雖云俸工銀兩所造然必先借用庫項後方抵補爾等豈肯明言其故乎至欲將三年俸工抵補虧空夫三年之內地方官員或陞遷或調用或革退或亡故以從前各官那用之虧空而將後來者之俸扣補

於理不順朕心實為不忍至於胥吏賤役若不給與工食此輩何所資生必至累民今部中每遇一事輒議令地方官設法料理皆掩飾美名實則加派於地方耳朕非但為百姓亦為大小諸臣保全身家性命朕南巡時聞龍潭地方建造行宮恐致累民曾諭總督阿山令其拆毀至他處建造行宮朕皆未之知也總之此不欲累民之念可以自信亦可見信於天下後世朕歷年蠲免天下錢糧至數萬萬有餘今此項虧空若令補墊亦不

為多然豈忍以此累地方乎至於查明款項亦非難事
錢糧冊籍皆有可考地方官借因公那用之名盈千累
百餽送於人若加嚴察隱情豈不畢露朕意槩從寬典
不更深求今海宇昇平國用充足朕躬行節儉宮中用
度甚為省約計明朝一日之用足供朕一月之需今即
因數次巡幸用錢糧四五十萬亦不為過明後年天下
錢糧以次盡行蠲免若留此虧空之項以為官民之累
甚非朕寬仁愛養嘉與維新之至意也

康熙五十年辛卯三月辛卯諸王貝勒貝子公滿
漢文武大臣官員及直隸各省士民以

上御極五十年請上

尊號

上曰朕自幼讀書歷觀經史持身務以誠敬為本治天下
務以寬仁為尚此心此念恪守五十年夙夜無間即纖
悉細務不敢稍有怠忽嘗觀古昔帝王君臨天下之久
能持終者蓋鮮朕今春秋漸高血氣漸衰而朝乾夕惕

實與日俱增正當恪慎保終孜孜為萬姓圖治安之時也蓋朕之御極年久皆

祖宗厚德景福積累貽留之所致至於請上尊號特虛文耳於朕躬毫無裨益史書所載加上尊號等事徒為先儒所譏有何善處而欲行之也

康熙五十一年壬辰七月丁酉戶部題原任西安正藍旗驍騎校巴布叩閣言伊兄薩爾布善曾撫養和碩安親王之子塞稜額田產家人等俱為塞

稜額佔踞入在包衣佐領下審問皆虛應將巴布
枷責以年老折贖

上諭大學士溫達曰此事所議不明

世祖皇帝時將裕親王恭親王付與殷實官員撫養及至
分封將撫養官員產業給與二王具題朕未允行大阿
哥曾付與內務府總管噶魯三阿哥曾付與內大臣綽
爾濟撫養分封時擬將伊等產業給與具題朕俱不准
行蓋主上子孫付與屬下人員撫養者特欲令其成人

長大並非欲佔其產業也撫養之人將主上子孫兢兢業業侍奉撫養能成人長大即其功也及長大成人之後又佔其產業籍其人口不但於理不合即受彼撫養之人亦於心不安五旗多有此事此風斷不可長凡事當以理斷之不可圖小利圖小利則與大體有礙設令將朕子與爾撫養之及長成分封時將爾產業給與將爾人口給為奴僕爾心服乎前下嫁與阿祿科爾沁巴特麻之縣君曾啟奏獻伊三佐領朕諭云朕乃天下之

主在彼在此俱為朕之臣庶若取至京師反損壞其旗
分故不准行蒙古王等聞之無不感激流涕土默特有
七佐領該扎薩克無後至今朕養閒居彼處前曾奏
請編在察哈爾旗下朕未允行後又奏請陪送公主朕
亦未行此皆朕至公無私之意今薩爾布善將宗室塞
稜額撫養成人反將其產業佔踞人口入在包衣佐領
下為奴可乎原本著發還

十月己巳禮部題康熙五十二年恭遇我

皇上六旬大慶中外臣民莫不欲竭尊親之戴上無疆之頌
其應行典禮臣等謹會同大學士九卿詹事科道
詳議具題

上曰朕御極以來惟欲萬國乂安上則敬

天法

祖下則垂令名於後世歷盡憂勤蕩平險阻自古帝王在
位不久論者往往歸於別故不知帝王一日萬幾實不
堪其勞憂懼所迫以致享年不永也昔帝堯固辭華封

之祝朕在位五十餘年壽屆六十今憂勞倍增血氣漸
憊惟恐愈久而力不支願不遂惟日兢兢惕勵而已並
無祈天永命之意也覽禮部所奏悉屬虛文朕惟願臣
清子孝兄友弟恭人人皆讀正書勉盡職業國安民治
盜賊寧息各以至誠實意為朕六袞慶祝朕心甚喜此
外儀文朕無所好所奏不准行

康熙五十二年癸巳二月庚戌

上諭領侍衛內大臣大學士九卿等曰趙申喬陳奏皇太

子為國本應行冊立朕自幼讀書凡事留意纖悉無遺
况建諸大事朕豈忘懷但關係甚重有未可輕立者昔
立允初為皇太子時索額圖懷私倡議凡皇太子服御
諸物俱用黃色所定一切儀注幾與朕相似驕縱之漸
職是之故索額圖誠本朝第一罪人也宋仁宗三十年
未立太子我

太祖皇帝並未預立皇太子

太宗皇帝亦未預立皇太子漢唐以來太子幼冲尚保無

事太子年長其左右羣小結黨營私鮮有能無事者人
非聖人誰能無過安得有克盡子道如武王者今衆皇
子學問見識不後於人但年俱長成已經分封其所屬
人員未有不各庇護其主者使即立之能保將來無事
乎且為君難為臣不易古來人君窮兵黷武者有之崇
尚佛老者有之任用名法者有之朕御極五十餘年朝
乾夕惕上念

祖宗遺緒之重下念臣民仰望之殷乾綱獨斷柔遠能邇

體恤臣庶毫無私心當吳三桂叛亂時已失八省勢幾危矣朕灼知滿漢蒙古之心各加任用勵精圖治轉危為安是以數十年來海宇寧靖今欲立皇太子必能以朕心為心者方可立之豈宜輕舉即臣僚為國為民念茲在茲先憂後樂者實不易得太子之為國本朕豈不知立非其人關係匪輕朕將允初從幼教訓迨後長成變為暴虐無所不為不知忠孝不識廉恥行事乖戾有不可言者推其故皆由風狂成疾迷惑所致此疾有二

十餘載矣如人醉後傷人醒時知悔今以長醉不醒所
為過惡身不自知伊之儀表及學問才技俱有可觀今
一至於此非風狂而何自廢而復立以來朕尤加意教
訓心血耗盡因伊狂疾終不痊愈故又行廢斥孟子云
父子之間不責善責善則離離則不祥莫大焉大學云
人莫知其子之惡蓋父之於子嚴不可寬亦不可誠為
難事如朕方能處置得宜耳爾諸大臣俱各有子凡人
幼時猶可教訓及至長成一誘於黨類便各有所為不

復能拘制矣立皇太子事亦未可輕定特召集爾衆大臣明示朕意趙申喬所奏著發還

三月戊寅朔

上諭諸王貝勒貝子公大學士九卿詹事科道等曰朕昨回宮見京城內外為朕六十壽誕慶賀保安祈福者不計其數朕實涼德自覺愧汗若先知之必諭令停止今雖難違衆志而因此夜思達旦朕為天下萬國蒼生之主萬姓安即朕之安天下福即朕之福若雨暘時若家

給人足則朕安寢飽食可以却病延年此朕所求之福也爾等傳諭凡有祝延萬壽者必以雨暘時若萬邦咸寧為先朕雖年老然夙夜匪懈履薄臨深之念與日俱增豈敢稍自滿假乎

乙酉

上諭大學士等曰朕聞各省民人祝萬壽來京者甚衆其中老人更多當春時寒暖不均又人非土著或不服水土亦未可定爾等可傳諭漢官等老人中倘有一二有恙

者即請撥太醫調治以稱朕愛養耆老至意

十二月甲午兵部題臺灣換班官兵遭風壞船及溺沉兵器應令地方官速行賠補

上曰海洋寬廣遭風壞船非人力所能為也若遇賊時船被燒奪理應賠補若此等遭風損壞亦令賠補太為寬抑嗣後有遇賊不能擒殺船壞被奪捏報遭風者除弁兵議罪外照例賠補若果被風損壞沉溺之船應免其賠補其沉溺兵丁等因公身死即幸而登岸者亦死中

倖脫之人殊可憫惻著地方大臣酌量加恩以示鼓勵
康熙五十三年甲午六月癸未

上諭刑部朕避暑塞外駐蹕山莊素稱清涼之地尚覺煩
熱想京師自然更甚朕時以民生疾苦為念今天下承
平農商樂業惟有罪之人拘繫囹圄身被枷鎖當茲盛
暑恐致疾疫軫念及此不勝惻然應將在京監禁罪囚
少加寬恤獄中多置冰水以解鬱暑其九門鎖禁人犯
亦著減其鎖條至枷號人犯限期未滿者暫行釋放候

過暑時照限補滿爾部即遵諭速行以副朕法外施仁至意

十二月戊子

上諭大學士等曰直隸各省州縣官或革職或被叅解任或身故者妻子尚能回籍其縣丞主簿典史驛丞等微員革職解任身故者無力回籍羈留異鄉不免凍餒以致累及妻子即使犯罪至死亦與妻子無涉殊屬可憫且如各地方鰥寡孤獨不能度日尚設立養濟院以育

養之此等微員理應撫恤嗣後將伊等作何令回原籍
爾等與九卿會議以聞

康熙五十五年丙申五月壬戌

上諭署理內務府總管事務散秩大臣關保曰去年直隸
所屬地方水澇未得豐收目今京師又旱朕心深為憂
慮自明日為始朕於宮中每日進膳一次先人而憂後
人而樂庶可感召天和也

甲子大學士嵩祝摺報京師下雨日期

金史卷四
卷四
上曰宋儒有言求雨得雨旱豈無因此意甚深今雖下雨
但雨勢未必遠及有何可喜之處求雨斷不可止必處
處霑足方可停止也

康熙五十九年庚子正月己卯諸王大臣等奏

皇上御極六十年請行慶賀典禮

上諭曰朕在位五十九年皆由

上蒼眷佑

列聖福德之所致也見在西陲用兵軍民勞苦去歲正月

朔日食海洋颶風飄沒官兵船隻山左東三府黎民饑
饉人心風俗未盡淳官箴政事未盡理此正君臣孜孜
求治之時慶賀之事著停止

康熙六十一年壬寅十月戊寅大學士九卿詹事
科道等以來年恭遇

萬壽七旬大慶詳議慶賀典禮合詞具疏奏請

上諭大學士等曰覽所奏皆過於實事朕以沖齡即位賴
世祖章皇帝定鼎以來深仁厚澤建不拔之業至今八十

年四海昇平有自來矣朕自幼讀書每覽前代帝王忿
懷憂患累其內機務紛紜勞其外年歲不久景祚不長
者未嘗不拊髀長歎朕涼德亦不過如此幸得歷逾花
甲年登古稀鬚眉皓白總理萬幾當此之際翼翼小心
惟恐善後之策不能預料保泰圖安夙夜冰兢況今西
陲用兵士卒暴露轉運罷敝民生乏食物價騰貴正宜
君臣同寅協恭乂安萬姓永致太平自古慶賀多者後
人不取況實無益乎朕御極六十餘年元旦之外未嘗

受賀惟六十壽時三月十八日進表行禮今鄉等所請
無庸多議

大清聖祖合天弘運文武睿哲恭儉寬裕孝敬誠信中和
功德大成仁皇帝聖訓卷四